


CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
DEC 17 1940

13

T 3222/0 .85. 2



福建續志卷二十九

哈佛大學漢和圖書館珍藏印

名宦三

漳州府

唐

許天正汝南人總章己巳陳政出鎮泉潮天正副焉

政沒子元光襲職凡所申請必與諮論而後行元

光居祖母喪以天正代領泉潮事平惠虔撫之寇

置堡三十六所嶺海輯寧陞中奉大夫兼嶺南行

軍團練副使天正博學能文軍政之暇未嘗釋卷

歷官副使宣威將軍兼翊府記室卒葬香洲之欄

馬頭宋時追封昭應侯府志

鍾紹京贛人開元初直鳳閣以討韋氏功拜中書侍

郎叅知政事明日進中書令越國公後與劉幽求

俱以怨望得罪再貶懷恩尉嘗賦詩中峰巖增梁

山十二峰為三十六開元十五年復其官府志

宋

沈造字次仲縉雲人知漳浦有善政時海寇將入境

聞造政聲悉引去漳浦縣志

趙偁夫魏王德隆之後嘉定間以進士任漳州司法

叅軍有惠政捐俸營廳署清源劉元剛為之記府志

魏郁字周文南平人建炎中補漳州尉適洞蠻竊發

朝命招撫之郁被檄先往數日朝命不至蠻以為

誑已使立雨中窘辱之毅然不少屈後洞蠻得命

悅甚厚宴之餽以白金五百良馬二匹郁不受府志

元

張泉逸延祐中為漳州路總管寬以恤民嚴以馭吏

尤以興學校為已任事簡民安翕然向化府志

陳文積福寧人至正間任長泰主簿公平勤慎守已

愛民常脩邑城以固保障御史王天智有新城記

長泰縣志

明

白壽嶧縣人洪武中以監生知漳州府剛介廉平政
尚簡要脩學校廣學額文風為之一變去後漳人

思之府志

梁玉監利人洪武十四年舉賢良方正任漳州府同

知廉介精勤嘗脩文廟鑄祭器以征倭勞疾卒於
官貧不能歸知府劉孟雍為營葬名第山子孫寓

籍龍溪龍溪縣志

阮思聰海寧人洪武十三年舉方正知長泰廉而有
守明而不苛抑強扶弱尊賢勸善脩壇祠設橋梁

賦役均平訟簡民安府志

楊通綏寧人洪武二十七年知南靖平賦役興學校

毀淫祠以創公廨不派取於民既去民思之南靖縣志

梁碩吉水人永樂十八年以進士知漳浦惠愛百姓

禮賢下士公暇講學以淑生徒怡然如家人父子

人感慕之漳浦縣志

陳炳杭州人洪武初舉經學九年任長泰縣丞安靜

不擾通易書二經親與諸生講論多所啓益時抽

軍丁民多懼匿炳處之至公民無不服長泰縣志

章參平陽人洪武舉人任長泰教諭教以忠信為先

攝縣事盡毀境內淫祠闢堂齋捐俸建龍津泰亨
二書院立學田以贍貧士府志

趙鎔華亭人永樂三年知長泰剛敏嚴明姦頑斂手
賦不及貧逃竄者率復其業卒於官長泰縣志

陳愚上高人永樂十二年知長泰慈祥愷悌訟者以
理解之使自消釋葺壞補遺不勞民力歷官三年
治教脩行時謂得牧民之體府志

林廷真象山人正統二年知南靖不避權貴四年入
覲過揚子江颶風大作同濟八十人皆沒於水惟
廷真與其從者二人得免祀名宦祠長泰縣志

劉鐸字振文麗水人成化八年知長泰廉明練達政
尚寬簡勸課農桑留心學校疏治陂塘葺壇廟解
舍朔望詣神廟以蠹政害民自誓歷任九載始終
如一府志

王臣字獻可安福人宏治初知漳浦縣英厲有為人
不敢干以私重建學宮戟門城隍威惠二廟決東
南陂障數十疏滌河渠修五鳳橋來往無病涉者
漳浦縣志

黃芳字仲寶崖州人正德進士授編修改寧國府推
官出為漳州府同知建議立先賢王東湖祠作歌

諭民行藍田呂氏鄉約作詩勸諸生進德修業芳
遠於理學不以文藝凌人官至侍郎府志

趙佩字鳴玉嘉興人正德十年知長泰有政聲貧不

能入覲百姓醵金為費卻不受及再任以老乞歸

百姓餽金倍於前拒之益堅眾為立卻金亭府志

羅幹字定本永豐人倫子正德十四年以舉人知平

和時縣治始建百度未飭幹悉心經理條緒井井

以勞卒民咸哀之

張鵬洪雅人進士嘉靖元年由御史出知漳州吏事

明敏剖決如流修建府署及表忠祠暇則課士不

輟卒於官人皆惜之府志

陸金吳江人進士嘉靖七年知漳州初至以討擒妖

賊黃日金等蠲寄莊寺租百餘石尤以廉著去之

日行李蕭然府志

顧四科字齊賢嘉靖進士十九年知漳州府訟者諭

以理使自釋不輕敲扑及妄罰一人待士大夫有

禮與百姓有恩時有七不肯七不會之謠林魁云

海兵以傷民命不糴海糧以累民財不出官票以

透番貨不弛番禁以滋海寇不縱捕盜以禍貧民

不肯也保以累無辜不多准狀以助刁風所謂七
一夫不假詞訟罰民抵贖不派里甲毫髮供不應
辱一生儒以傷士氣不累良家婦女出官以虧禮

化所謂七
不會也

陞陝西提學副使民祠祀之

府志

盧璧字國賢盱眙人嘉靖進士二十九年知漳州府

居官廉潔蒞事嚴明承公私冗濫之後痛加省約

尤好獎進孤寒崇尚行誼其威惠廟清侵沒祭租

以供費繕城隍廟及各祠宇政暇修郡志親自編

纂民至今思之

府志

桂嘉孝成都人進士嘉靖三十八年知漳州值饒寇

來犯嘉孝造守城兵器改窩舖為敵樓悉心防禦

城賴以全擢兩浙運使

府志

陸體仁蘭溪人嘉靖二十七年授漳州府管糧通判

愷恻廉潔追徵常平鎮海倉米不受常例署龍溪

漳浦二縣鍰贖盡歸公帑知府盧璧深敬禮之

府志

黃直字以方金谿人嘉靖進士任漳州府推官恤貧

窮懲奸猾民德之嘗署長泰漳浦兩縣擴學宮置

射圃立文公祠建講堂齋舍經費皆取之淫祠而

勇不逮民每朔望蒞學與諸生講義理日中乃退

以讒置理漳人士作鳴冤錄事得白二邑士民贈

之金悉委以脩學改判沔陽未行復以建儲事直

諫得罪放還天下壯之

府志

鄭禧字宗慶縉雲人嘉靖十年以舉人知漳浦為政

以愛養民力變化風俗敦節行崇名教為急禧故
浙中名士尤精於學庸政暇輒進諸生口授之凡
斷獄必依經義有弟訟兄者禧曰事輕倫重乃為
陳父子兄弟之親令自感愧邑自析置詔安苦賦
重僖言於上官得減陞安慶府通判漳浦縣志

王用文建德人嘉靖二十七年知長泰強敏善記事
無巨細經目不忘聽訟明決豪右宿猾莫敢犯任
三年未嘗遣一吏胥至鄉去之日橐囊如洗

張傑夫新會人進士嘉靖三十一年知長泰為政務
與民休息邑奸民魏某等謀據城為不軌傑夫偵

知之嚴為之備奸徒知事洩亡去邑賴以安府志

黃持衡字平叔番禺舉人嘉靖三十年任平和教諭
時文教未興持衡闡明經學耳提面命月常數試
尤以禮義自檢諸士咸相勸為善官至府同知平和

縣志

房寰字中伯德清人隆慶進士萬歷元年知漳浦卓
犖有吏才仕族子弟多干紀寰廉得其尤者置於
法邑多劇盜悉捕渠魁窮治之盜以屏跡時有權
鹽召商之令所在騷然寰抗言不可大府不能奪
竟罷權尤加意學校考試宿弊一清任五載擢監

察御史府志

侯嘉祐橫州舉人隆慶四年知長泰舊例邑令私費多取辦於民嘉祐悉除之稽按錢穀置侵蠹尤甚者於法聽訟必原其情微瑕細故釋不問十邑訟者皆乞詣長泰以旱禱得羸疾卒俸金數鋌而已士民哭泣罷市建惠民祠祀之初嘉祐因歲旱穀貴傲古社倉法創捐俸金為糴本土民出資佐之及歿貧甚邑人賣粟為贈其三妾哭曰公為民市穀而忍自以為利固辭不受士民乃以為建祠費

府志

陸宏字汝充長洲舉人隆慶五年知平和廉介慈惠

革舊例除火耗一絲一粟未嘗取於民以憂去行

裝莫辨平和縣志

韓擢博羅人萬歷進士二十七年知漳州明爽果決

時內監高宗權稅算及鷄豚擢力奪其議七郡賴

以晏然捐俸造文昌橋陞四川副使府志

鄭堯章東莞舉人萬歷十四年任清軍同知居官廉

惠莅漳五載初終一節擢刑部員外郎漳南士庶

咸追慕焉府志

龍文明永新人萬歷進士十七年任漳州府推官署

郡事建四門社學立義倉清屯政核戎伍政聲卓然陞刑部主事歷官山東副使府志

王猷字在吾慈谿人進士萬歷二十七年知漳浦以

邑形勝發源摩頂山地脈崩壞前令楊材修築未

就徵贖鍰竣之內監設雲霄鎮稅為竭澤計猷以

去就爭之事遂寢妖僧從普符呪害人立斃之獄

修學校及智信二社學建城樓公署橋梁陞南京

工部去民祠祀之府志

蔣英字瞻岷嘉善人萬歷進士四十一年知漳浦聽訟得情不徇干請邑有斷腸草服之輒殺人英令

輸贖鍰者薙草一時遂絕歲饑請發賑復捐俸煮

粥全活甚眾以艱去士民思之府志

方應時字以中遂安舉人萬歷間知長泰才識開敏

尤嚴於鋤奸雖權貴無少避脩雉堞濬陂塘築石

岡山暇則集諸生明倫堂課督之供筆札庀飲食

士爭自矜奮遷肇慶同知民為立祠尸祝焉府志

蔣良鼎武進人進士萬歷中知長泰公廉有威剽煩

治劇吏不敢欺治未週歲廢脩隳舉調龍溪以憂

歸囊橐蕭然漳人祠祀之府志

管橋南陵人進士萬歷間知長泰革無名陋規免麻

戶新文廟及朱文公祠疏陂渠清屯糧寺租時礦使暴橫橋力為裁抑攝龍溪令風清弊絕尋擢監察御史民為立祠

長泰縣志

楊守一泰和舉人萬歷中知平和性沉毅明敏訊決如流胥吏不能為奸廉巨猾為民害者置之法境內肅然諸如嚴圖賴之禁寢丈量之議清官地之稅皆政之善者遷別駕去民為建祀焉

府志

祠府志

藍士龍字起潛金谿舉人萬歷中知平和政尚簡詩訟者不遣隸勾追聽兩造自至而斷決之催科絕包收飛詭之弊陞河東運副稱貸以行

府志

夏宏海陽舉人萬歷中知詔安以興起斯文為已任建文昌閣扁其堂曰正學置義塚三所恤貧窮賑鰥寡政尚寬簡去後人多思之

詔安縣志

黎天祚東筦舉人萬歷間知詔安卻例金行保甲建南山塔時海寇陸梁邑以有備得全邑人祠祀之

詔安縣志

周立宜山人舉人萬歷間知詔安興教化省刑獄卻常例革鋪行禁誣扳嚴保甲修道路築津梁美績著聞擢知和曲州府志

龍國祿字廉孺桂平人萬歷進士知海澄縣顏其齋曰如水採礦事起中璫高竊入閩威權旁震國祿分庭倨見嚴威澄民之為璫用者竊軒車高大國祿下令縣中悉低狹其柵門使不便於行竊氣奪以調去父老相率詣臺乞留不得送者塞途數百里乃返祀名宦祠海澄縣志

姚之蘭字汝芳桐城人萬歷進士知海澄縣邑故有

禾平莊田屬澄而龍治其賦隔屬滋弊又鎮海倉者衛故隸浦而密邇澄軍儲上納歲徵諸澄澄民苦貽累前令龍國祿陳其害未得請之蘭申請益力於是莊賦歸澄倉糧改折積年重負始獲息肩九郡自普賢草尾一帶旱苦積鹵令濬渠於祖山通石碼河淡潮以匯於澗而達諸泮池剏置學田供費之餘以贍貧士丁外艱去後歷杭汀二郡守卒祀名宦

黎憲臣號淳宇南昌舉人萬歷間授平和教諭築文峰石塔及雲龍精舍文昌閣又建尊經閣敬一箴

川文系元
亭其去也士民立祠祀之平和縣志

歐陽松安福人萬歷間任詔安訓導有學行與諸生遊必取古人有行誼者以相規勸貧者卻其脩脯日周之學使檄取劣生松不以應自言某不能以職教人其有劣則某罪非諸生罪學使以為長者
褒嘉之府志

劉斯球字大容南昌人萬歷進士天啓二年知海澄修學宮港生二城易以石未幾寇迫近郊斯球鎮之以靜寇遁去築障水濬置銃砲待敵後人銃城砲臺實祖其制擢給事中以忤旨奪官府志

鄒人昌字參廉麻城人萬歷進士天啓二年知平和聽斷立剖胥吏無敢詆誤所有贖銀盡以蠲貧民陞刑部主事民攀留載道府志

黃鳴治莆田人天啓三年任詔安訓導多出從諸生遊或至其家借書讀竟日乃還諸生貧不能供脯贊者或具以來輒卻之惟名義所在必侃然正色雖權貴人不避也卒於官弟子哀思之詔安縣志

金麗澤不知何許人崇正末知漳州府廉靜有為廖淡倚聚眾作亂蹂躪漳平寧洋龍巖間民大騷麗澤率兵與參將顏榮搗其巢斬之丙戌 大師入

漳麗澤與漳南道傅雲龍龍溪知縣涂世名同日
死之府志

劉養正字念衡大邑人崇正進士授漳州府推官署
詔安事時盜賊繁興一日逼縣養正登埤諭之賊
投戈去下令城內外樹木柵夜必親巡修演武亭
復民兵調練有法凡例應得者不以自私率充為
兵餉遇事剖決如流庭無冤獄民以神明頌之府志
涂世名字仲嘉新城人天啓舉人崇正末知龍溪
大師入漳世名被執死焉長子常吉僕黃錫黃羊
王亨蔣三同日俱殉漳人士素德世名贖金三百

餘兩櫬乃得歸世名偉幹脩髯善飲談古今事慨

慨激烈卒成其志居官清介自持父老稱說之有

泣下者龍溪縣志

鈕應斗嘉興人崇正進士知漳浦年二十餘敏於吏

治歲荒捐金市粟減糶平錢法除叛民鼎革後還

里杜門不出府志

文可黼涪州人崇正中知長泰家素裕攜貲之官歲

稔出以賑粥葶苳者葬之迹戲劇禁師巫抑權貴凡

無藝之征悉除之值御史行部有權貴以私憾密

投謗揭御史詰之詞色俱厲可黼侃侃爭辨解印

綬去民大噪御史問狀召可黼入改容謝之期年
卒於官巷哭如喪考妣府志

余應桂字二幾都昌人萬歷進士初令龍巖後調海
澄邑多寇警相度要害築溪尾大泥兩砲臺繚以
周垣如城而於中禁關聯絡之沿溪砌石爲腰城
長二百餘丈各置砲孔賊艘入發擊之輒沉溺由
是相戒不敢犯性明敏善剖決事無大小皆立斷
擢御史去後巡按湖廣以論張獻忠不宜撫下獄

府志

郁文初蘄水人崇正十五年知長泰浚濠壘堞勸富

人出粟實倉製兵器召募壯勇智謀之士以備守
禦順治壬辰海寇圍城四十九日泰卒保全者文

初先事綢繆之力也

長泰縣志

阮應辰字箕畢臨山人天啓進士歷官漳南總兵時
盜賊充斥梁山洞寇尤劇將攻城應辰率守備何
南璽疾趨八十里至苦竹與賊戰或以寇鋒銳宜
稍避之應辰喟然曰此吾死所也奮身突陣與南
璽俱死焉賊感其義不攻城而退且以屍授應辰
姪載歸授命錄

國朝

楊捷字元凱原籍楊州先世仕遼因家焉遂爲義州人以功歷九江總兵隨征福建江南提督山東皆有功而於漳績尤著順治甲午海寇肆逆捷以左都督充福建右路總兵官所當無敵抵漳浦逆聞奔竄是時漳屬郡縣城率被寇拆毀捷駐漳浦築城民賴以安康熙戊午逆復煽據厦島蹂躪漳泉復奉命督師入閩時姚制府啓聖在漳羽書旁午趨援捷以不先安泉而卽援漳將有腹背受敵之虞遂長驅復惠安縣解泉之圍疾馳至漳與啓聖商破敵策是冬克江東橋萬松關已未春寇距

險立巢捷絕其要道俟其困帥師擊之逆潰焚舟擒僞將斬馘無算庚申二月賊分據扼要立十九寨相連絡要援以拒我師捷出奇計破之令首尾牽制難以四應乃會師攻復海澄復三路進剿厦島擊沉賊艦斬馘不勝計閩逆旣平

溫旨調還

提督江南授昭武將軍捷用兵如神馭下威惠兼濟而於民尤加意撫循故所至將卒用命而民人乂安漳人爲像祀之漳浦民尤感其恩祀於懷德書院曾孫景素巡海汀漳龍道

府志

利在三高要貢生康熙九年知龍溪時糧額虛懸積

弊無可鈎稽在三通計一邑田畝按數勻派又遷界之後各邑寺田浮餉令甲兌徵而前令獨以內治墾田詳報抵額在三為行勻餉法民困大蘇

龍溪

縣志

魏明德鑲藍旗人康熙十六年知龍溪旋調軍前十八年再任性寬簡遇事敢為時軍需夫役刻難猝辦明德按籍鈎稽豪右無敢訛法者役均而民不擾軍士占民居請諸大帥立為清還士民咸倚賴

之龍溪縣志

線應綵正藍旗人康熙二十四年知龍溪時寇亂初

平規制未備應綵捐俸建縣學明倫堂及新倉義

倉邑民甫離兵革為休息噢咻之祀懷德祠

龍溪縣志

曹家甲字為質號安峰新建人康熙丁丑進士四十

一年知龍溪對簿不事鈎距各得其情訟庭闐寂

邑賦舊有包納之弊吏役率中飽而官民均受其

害家甲催科不用差役復為減耗之半民樂輸無

負逋者月課士及童子試必躬定甲乙俗多停柩

不葬為購北廂江東日照巖義塚三所親定向指

掩暴骸無算工竣日有海燕數千繞廡翔鳴人以

為澤枯之瑞邑東有響水橋久圯為砌以石作亭

橋東以憇行者去之日民若失慈父攀轅數十里
後以子繩柱任福建布政使贈如其官龍溪縣志

劉良璧衡陽人雍正甲辰進士九年知龍溪公正明
決案無留牘脩南西北三門城樓建威鎮閣造騰

龍山石塔以調去民至今思之龍溪縣志

申景雲吳縣人雍正十三年知龍溪愷悌宜民眾稱

召父時有饋以盆蘭者發泥視之乃金也卻不受

卒於官囊不名一錢邑人士賻之乃得歸龍溪縣志

李芬正藍旗漢軍舉人乾隆三年知龍溪旋調去五
年再任值歲歉勸諭平糶以甦饑民開濬城濠使

水不壅遏尤長於摘發猾吏無敢詆謫調同安士

民大書樂只君子以送其行龍溪縣志

延平府

五代

林揆偽閩王延政時為永順場官南唐保大中陞場

為順昌縣揆知縣事當干戈擾攘之餘政尚簡易

民德之府志

宋

程博文樂平人元豐間知州事政尚寬平以僧牒募

民鑿黯淡之險行舟無患歷官司農少卿閩書

王瓘字元玉明州人以福建轉運司主管領知沙縣
歷歲最久多善政

沙縣志

葉光處州人紹興間以奉議郎知沙縣政尚寬厚嚴
於釐奸除害其去也民立祠于靈衛廟

閩書

黃去疾邵武人咸淳間知將樂劔龜山書院政暇與
士子講習訂正龜山年譜卒官返櫬經邑之儒林
堡值大風雨遂葬焉

閩書

趙時賞字宗白和州宗室也居太平州咸淳元年登
進士第累官知宣州旌德縣文天祥開府南劍奏
辟時賞叅議軍事兼江西招討使空坑之敗被執

不屈死之

府志

劉沐字淵伯廬陵人文天祥起兵辟補宣教郎叅督
府機宜天祥歸南劍沐收部來會改授大府寺簿
空坑兵敗被執與其仲子同日死焉季子復從天
祥死嶺南

府志

呂武太平州人初為步卒文天祥出使應募從行偕
脫鎮江之難沿淮東走海道賴武力為多天祥開
府南劍武以武功補官遣之結約州縣起兵相應
道阻復崎嶇數千里即天祥於汀梅以環衛官將
數千人出江西死於橫逆一軍揮涕而葬之武忠

鯁出天性不避強禦而好面折人過觸忌諱故及於禍府志

明

俞廷芳麗水人洪武間知府事政尚簡易蠲役教士有惠德去後人思之府志

周政館陶人洪武間知順昌縣興學重農下不忍欺府志

張登濟南人永樂間知順昌縣公勤廉仁吏民畏服未期卒官行橐蕭然府志

徐中鄆縣人正統間知南平縣慈惠廉明不施笞楚

一毫不取於民民甚悅服閩書

鄭時字宗良舒城人成化間知府事嚴明慈惠事無不集而吏罔售奸上下安之官至刑部尚書閩書

二範字子儀開州人成化間知府事忠厚坦易恤民好士郡中風俗利病罔不周知手定徃役品第貧

富適均斷獄明允無滯官至湖廣布政使閩書

易賜廣昌人成化間以舉人知沙縣廉於守已寬以愛人鄉人賈沙者干之執法不貸閩書

何士麟蒼梧人進士宏治間知將樂廉明有為政知大體先務育才撫采邑志百廢俱興秩滿擢刑部

主事閩書

朱叔綸江陰人宏治間知尤溪縣慈惻不苛待士有禮愛民誠而讞訟慎府志

劉燦臨川人舉人宏治十一年知永安縣居官廉謹

精於聽訟不肯撓法狗人重建儒學修橋梁道路

百廢俱舉陞池州通判永安縣志

田秋字汝力思南人正德甲戌進士任推官純篤持

正治獄不冤在郡二載以憂去閩書

胡綸桂林人正德間舉人任尤溪知縣遇亢旱晨夕

拜庭中徒跣出祈大雨隨注以憂去貧至不能奔

喪閩書

余曠樂平人嘉靖間進士任府同知持正不阿政務

大體遷郡學於西郊尋擢按察司僉事府志

曾子欽泰和人舉人嘉靖間陞延平同知署府事欽

剖決無留獄吏不得為奸視水口鹽政苞直不行

擢員外郎閩書

薛宗愷字子脩海陽進士嘉靖六年知將樂縣厚重

簡默以介自守政事不務苛刻而井然有條吏畏

民服後擢都諫以直言卒士論惜之閩書

徐勳長洲人嘉靖間知永安縣清慎有才察民欲惡

與為興罷時有龔渤海之稱卒於官府志

鄧瀾鄱陽舉人嘉靖間知將樂縣坦易寬簡改建學

官創修橋道禱旱而雨降祭河而風息以調去閩書

潘龍南海人嘉靖間知尤溪慈仁儉約平獄訟均徭

役捐冗差民作去思錄以紀之府志

朱衡萬安人進士嘉靖間知尤溪縣介然自守好惡

興革悉當民心調知婺源民不忍其去立去思碑

後督學閩中府志

洪俊遂溪人嘉靖中將樂主簿廉靜寡欲邑多虎患

又水壞橋道俊教民立穿虎椿復甃橋建石墩卒

於官知縣薛宗鎰檢其囊篋蕭然為之流涕太息

閩書

徐久德上饒人由選貢授府推官愛民禮士兼署守

令篆值歲荒發粟賑貸遷南京工部主事郡人建

祠置田祀之府志

羅心堯德化人萬歷間以進士任府推官修書院建

社學定錢法勤課士有政聲閩書

傅宗臯豐城人萬歷間以進士知將樂廉靜果斷除

新法以便民尤嚴禁盜賊至於夜戶不閉召入為

御史閩書

張應樞鄞縣人萬歷中以貢授沙縣丞廉以自牧兩署邑篆及署尤溪永安皆有治狀陞上猶知縣

張守讓番禺人萬歷中舉人知永安縣廉介簡直撫

良民興社學尤嚴積蠹剔除殆盡陞大理寺評事

府志

徐輅海寧人舉人萬歷五年知永安縣里甲不敢持

一菜至庭三年革弊清軍節省民財以千計被讒

去府志

李如鴻嚴州人天啓間由舉人令永安重士農撫商

旅均徭役勸徵輸考績為天下最轉山西忻州守

府志

國朝

王道新山東人由進士歷侍御以抗疏轉閩守道駐

延平時驛站無夫久役坊民極力設法蠲免大兵

過延駐郡養馬民心洶洶道新調度有方兵過無

擾陳閩民疲苦十條疏上未下以浮議去宦橐蕭

然府志

傅登瀛字蓬洲蓋州人康熙三年知沙縣事首革加

派之弊民感之時歸誠弁兵屯境上為量地以居

民得不擾以養歸邑人立祠祀焉

沙縣志

王汝棐松陽人康熙乙未進士分巡延建邵道寬以
惠民恭以禮士發奸剔蠹凜若神明德威所至人
不敢犯府志

胡寶琳字海槎歙縣人雍正己酉由廩生保舉歷刑
部郎中精於律例鍊於事故手立爰書胥成鐵案
堂官倚重之後守邵武於讞獄多所平反上官委
以會鞫諸案悉稱明允調繁延平治法如邵武時
乾隆十三年春正月鄰郡奸民魏現聚眾謀不軌
寶琳炯知之卽率將吏擒獲焉事乃定白於上官
職厥渠魁脅從者概予末減省釋全活甚眾尋舉

卓異擢山東鹽運使去之日士民遮道攀留不獲
追送至數十里不絕至今猶謳思之隱拙齋文鈔

建寧府

宋

王伸字彥發邵武人進士知建州以治最聞官至司

農卿閩書

鮑祇紹聖間知建州明決如神吏民信服既去民像
祀於大中寺閩書

張銖紹興十四年知建州修築城郭留意學校明年
乞祠去閩書

范璿字舜文豐城人政和進士紹興間知甌寧縣平
 心率物吏民愛之太守魏砮以治狀聞召對便殿
 問何以得民曰臣知為陛下愛赤子耳歷官右司
 郎中以秦檜不合出知南劍州書閩

汪應辰字聖錫玉山人為秘書省正字以言事忤秦
 檜出通判建州有政聲浙江通志

陳洪字禹範南安人登嘉定甲戌第通判建寧攝府
 事兵燹之餘痛加撙節郡計以裕真德秀薦其才
 可大用府志

徐應辰處州人知政和縣首興學校設聖賢像東西

為齋四以處生徒稽糧儲之人以養之直文忠公

為記府志

程璣字子立休寧人嘉熙進士知建寧府有善政府志

李耆明字子誠建安主簿平反延平獄法當改秩耆
 明曰豈以賞故使前鞫者坐罪也秉性剛廉自號

水壺居士有文集閩書

元

徐屬至正間為建安尹徙縣治於崇化坊通判廳之

故址多惠政府志

唐兀伯顏字靖齋大同人至正末尹崇安理軍治民

有戢亂功明初徵至京師以老乞歸仍居崇安清慎不改老稚敬愛之稱為故侯府志

真寶字朝用蒙古人任政和縣達魯花赤廉公有為律已嚴而待物恕八路疑獄行省必以屬無弗允者後調南平官至南臺監察御史閩書

明

李思中荆門人洪武間知甌寧縣慎刑罰均賦役民愛之如父母以憂去府志

陳宗源祁門人永樂間任建陽縣典史處事公平九年如一日秩滿當遷邑民懇留事聞陞本縣知縣

閩書

張光啓建昌人宣德間知建陽縣鋤強去暴吏不敢欺篤意斯文士心悅服府志

周原慶字永新麗水人宣德間以人材薦知浦城縣公忠清介囹圄空虛陞刑部郎中

胡欽河間人正統間知建安縣廉能有威時沙尤寇作大兵征勦欽給饋餉躬撫捕民賴以安陞延平知府以卓異賜勅褒美官至陝西布政使閩書

張端嘉善人成化間知建安縣興學撫民政教兼舉有中貴經縣恃勢索賄端力抗不與卒於官民頌

之不衰

府志

周季邦江西人進士成化間知建安縣廉明剛介政

先窮民待士有禮以直忤上官調去

閩書

汪律字用和樂平人進士成化間知建陽縣五載有

循績以治行第一擢御史

府志

戚雄字世英金華進士正德間知建陽縣平易近民

鋤強扶善遷學置田凡公私常費一切省便調南

海令尋擢御史

閩書

張萱字德輝上海進士正德間知政和縣首均徭役

攢造丁料積弊悉除修城池葺學宮創養賢堂於

文廟之北遷茶陵知州

府志

胡汝礪字直夫泰和人嘉靖間知建安縣澣衣蔬食

愛民如子雅意學校所聽斷得情卽釋去士民誦

之

閩書

蔡金梧州舉人嘉靖間知甌寧縣不畏強禦不虐無

告嚴拒餽遺貧甚至種園蔬以自給

閩書

徐文沔開化進士嘉靖間知甌寧縣以文學飾吏事

以撫字督催科拯困窮抑豪右守以廉靜持以撝

謙稱一時循吏

甌寧縣志

朱默字時言太倉進士嘉靖間知建陽縣修葺學宮

創講經堂及號房數十間以居肄業之士以憂去

建陽縣志

張謙字子益慈谿進士嘉靖間以刑部郎謫建陽縣

尉知縣事剔政蠹屏吏姦抑豪強正士習為一時

賢令閩書

呂光洵新昌進士嘉靖間知崇安縣年少御事如老

吏在任六月諸廢俱舉以內艱去官至南京工部

尚書祀名宦崇安縣志

邢埴當塗舉人嘉靖間知浦城縣敦禮耆碩洞悉民

間利弊約法不爽捐俸修學宮御史李鳳翔為記

其事府志

徐時濟字汝霖鉛山人嘉靖間任經歷年少練達苦

節自勵歲荒捐貲以賑當道交薦之以艱夫書

蔣科泰州進士萬歷五年知建寧府廉公莊重自奉

甚薄秋毫無取於民戒屬官毋濫罰贖興學禮士

善政著聞府志

汪元標字承景新安進士萬歷間知建陽縣多德政

後陞閩省右布政道經潭邑老幼焚香迎者塞道

建陽縣志

徐晬然崑山人萬歷初以貢士任建陽縣主簿廉勤

仁恕以儒術飾吏治訟者咸願質成焉陞中江知縣去日士民揮淚送之府志

任僖鄞人萬歷間知浦城縣折獄明允隆學校恤孤寒祠廟壇壝多所建立以最調候官縣浦城縣志

沈鼎科字鉉臣江陰進士崇正間知建陽縣秉性廉介杜關節絕餽遺每節期壽日輒大書敬謝餽儀四字於門值大造嚴革陋規歸橐蕭然建陽縣志

郭之祥字宇山吉水進士崇正間知崇安縣在任七載清介如一捐貲修學校及祠宇橋梁時考選翰林外任者皆得與之祥中選士林榮之崇安縣志

劉若金字雲密安福進士崇正間知浦城縣風規嚴整禁賭戢盜於善類則拊循之四民樂業歷官巡撫都御史浦城縣志

國朝

李葆貞字守一廣寧人順治三年知浦城縣時流寇嘯聚葆貞嚴戒備昌矢石賊黨悉平大兵過境有流言邑民謀不軌者為力爭得釋復脩學宮纂邑

乘捐學田以給士濬池泉以禦災縣治城垣以次脩舉陞三衢同知浦城縣志

魏昌字重光利津進士順治間知甌寧縣寬厚廉平

澹泊自甘於催科中寓撫字課諸生文面加品評
媿媿不倦以艱去府志

耿佐明杞縣進士順治間知甌寧縣秉心藹吉雅有
清操接見諸生諄諄以敦本為訓其所識拔者先
後皆獲隼人服其衡鑒卒於官甌寧縣志

李元璣德州人康熙四十五年知浦城縣廉明強毅

奸蠹屏跡浦俗命案屍親肆掠仇家璣嚴戢之弊

乃絕捐俸移學宮於皇華山麓士民均誦之浦城縣志

趙孔起長山人雍正三年知浦城縣首造士以培元

氣諸生赴省試各分俸為行資貧士通糧不令差

役勾攝其尤貧者代輸之嚴禁鼠竊幾於夜戶不

閉浦城縣志

邵武府

宋

江適陳留人知光澤縣嘗定經界於民無所擾民感

戴之府志

戴式之號石屏天台人紹興中為教授有學行人士

化之尤工於詩閩書

楊獬淳熙中知軍事朱子嘗涉其境謂獬之政事可

觀士民交口誦之乃文學士非俗吏也閩書

徐元德永嘉人淳熙末爲邵武軍教授建祠祀李忠
定公綱俾鄉人有所觀感興起朱子爲記雅稱重
之府志

江鈿知泰寧縣事值寇亂鈿率兵討平之閩書

錢衢字守道錢塘人開禧初知建寧事神治民克盡

其誠增修學校士風以振建寧縣志

葉寀字仲圭建安人嘗從李果齋學有文行淳祐末
知軍州事作郡乘買田築祠祀朱子於郡泮復錄
田若干頃祠朱子於光澤以果齋配其他政績亦

多類是府志

段震字能可漢陽人淳祐間爲建寧丞舉職業則

蠹弊振廢墜有遺愛在民更以文學稱閩書

元

陸文英携李人至正間邵武尹政浹民和嘗新廟學
後以薦陞都轉運鹽使司經歷府志

朱萬初號潛虛江西人至正間光澤縣尹政浹民和

境內寧謐光澤縣志

明

章文旭武進人洪武初通判廉潔有幹才時承元末
凋弊之餘凡學校公署橋梁百廢具舉府志

常理湘陰人洪武中推官存心廉恕用刑不濫而獄無滯囚

閩書

林孔孫山東人洪武中知光澤縣興學校崇教化課農桑脩廢墜政平訟理民賴以安

府志

王可宗溧陽人洪武間知泰寧縣革積年蠹弊民賴以安秩滿耆老詣闕懇留許還職民祠祀之

泰寧縣志

李復觀饒州人永樂中知邵武縣以文學飾吏事不假鞭扑而民信服及去猶思慕之

府志

周英字子傑合浦人永樂間知泰寧縣愛民訓士政尚寬平去之日民遮道不忍舍

閩書

傅礪錢塘人永樂中任邵武縣丞清謹精勤有政績

後陞建寧令亦以廉能稱

府志

李協中臨潁人洪武五年任建寧稟性溫厚撫字有方斷決明敏庭無留訟吏不敢欺民懷其惠終於

官人思慕之

閩書

劉仕傑蒲臺人性質剛毅以廉介自守無所阿附均賦愛民軍需不勞而辦為吏民所信服終於官

閩書

高鑑高郵州人以蔭襲邵武衛都指揮使熟武略嚴操守愛恤軍士不輕差遣軍士戴之若慈母子陞

襲職平上杭漳州諸盜皆有功

府志

陳宗諫東鄉人萬歷間知光澤縣慈祥清潔一絲一粟不取於民至禦水災賑饑饉尤多覆露拊循之術去之日士民涕泣以從閩書

譚際可仁化人萬歷二十四年以貢士知泰寧縣樂

育青衿乳哺赤子不受餽遺以不阿被調入共惜

之府志

國朝

姚宸中字寰邱常熟人順治間知光澤縣邑罹兵燹

之後民多負逋宸中力請緩征以蘇民困復簡訟

獄寬徭役人至今思之光澤縣志

陳于達號岳樓臨湘進士康熙九年知建寧縣革陋

規賑饑民葺學宮城池修邑乘以憂去建寧縣志

王吉字枚臣安福人康熙九年以進士任光澤縣減

丁壯浮額豁夫役夙累繕學宮書院建先賢祠百

廢俱舉光澤縣志

畢友宜字凌峰蘄水進士康熙二十八年知建寧縣

清介和易與民休息有古卧治風其榜署門云却

五夜之懷金對影無慚暗室伴兩階之舞鶴焚香

可告上蒼建寧縣志

王授位廣陵人康熙五十一年任邵武同知性耿介

執法不阿攝光澤篆繩蠹胥以法吏無敢詆諆者
均斗斛輕耗羨早禱雨立應旋卒人立祠祀之光澤

縣志

皇甫文聘字斯未桐廬進士康熙五十九年知建寧

縣修文廟建朱子祠置學田居官若寒素

建寧縣志

吳堂字介石華容人康熙庚辰進士知光澤縣立文

社以養士民社以養民邑清苗糧有多推少收私

割諸弊為均平之時鉛山有警堂嚴守備邑賴以

安遷開州知州

光澤縣志

謝紹仁字希純銅陵人知光澤縣邑饑發賑全活萬

餘人雍正十三年奉文清丈軍田紹仁力為請免

陞戶部主事人為立祠與前令王授位並祀

光澤縣志

福建續志卷三十

名宦四

汀州府

宋

危建侯邵武人元豐進士知寧化縣不任刑罰專以

德化民民懷之生子多以危名者府志

鄒括泰寧人紹聖中進士知寧化建學訓士待人以

恩信去之日民立祠以祀府志

鄭構致和申任寧化黃土砦巡檢有平寇功府志

趙時鎬宋宗室寧化當紹定兵燹之後邑治為墟時

銘爲宰築城修學創縣治葺民廬士民誦之府志

明

劉亨鄭州人洪武間令上杭新學校建壇壝在任五年逃亡悉集薦胡時邱子瞻時稱得人府志

黃敏洪武中爲汀州衛指揮僉事廣賊謝士真寇邑敏率軍勦捕賊遁走復築城分軍守禦府志

伍希閔安福進士御史驥之子成化間分巡漳南道駐上杭時賊劉昂溫留生邱隆等聚衆猖獗希閔招撫之降者千餘人立二團營處之昂等勢孤皆就縛餘黨解散旋以憂去宏治五年賊劉廷用復

聚衆來劫南贛巡撫金澤薦希閔才抵任募驍勇

李福瑛鄧維端勦之寇悉平府志

趙智江寧人成化九年署歸化教諭時學宮初建士未習禮智教以進退揖讓日進諸生授經講解未

二年有登賢書者府志

程材歙縣人宏治間進士授汀州推官嘗與巡按御史據法爭一囚御史曰我不知法耶材抗論不已御史忽悟曰推官言是也幾悞殺一人矣舉廉卓

授御史府志

王環新昌人知永定縣時邑草創環興利除害有惠

政府志

向陞武平所百戶正德四年賊曾惟茂等攻城劫掠
陞募兵轉戰多所擒獲賊又進據焦頭壩掛坑等
處陞擁衆先登誅斬無算死於陣事聞世襲其子
爲本所副千戶府志

周楹安福舉人正德間令寧化適賊攻邑身詣諭之
賊挾之去不爲動賊義而歸之臨去謂賊爾輩所
虜皆良家子女忍困之乎賊悉還焉歸而繕城隍
固守禦賊遂平府志

潘時宜永豐舉人嘉靖中令寧化修縣治創書院設

學田士氣振興府志

查仲道字文夫寧州人以謫知汀州有惠政卒於官

民立祠祀焉府志

劉宗寅字子肅江西萬安人署連城縣事邑苦饒寇

宗寅兩定其亂歲饑捐賑民賴以甦府志

陳添祥沂門舉人嘉靖末令寧化值流賊攻縣添祥

守禦有方屢擊敗之府志

毛子翼餘姚舉人隆慶四年判汀州革包攬平斗斛

聽民散納以羨餘推給貧士府志

桑大協常州人隆慶間令清流釐正戶口申豁至三

千丁有奇

府志

劉玉成號谷溪太倉州人萬歷初以進士授汀州司

理不事鈎棘訟簡刑清以最內召尋復出守汀州

喜接引後進士風丕變人比之文翁歷官湖廣叅

政

府志

萬振孫合肥人萬歷間以進士守汀州加意學校建

龍山學舍以課士學使按部振孫請加九學科額

四十名捐俸增貢院號舍汀人士至今思之

府志

陳正蒙字穉開歸善進士萬歷中知歸化縣清廉慈

愛禁蠹役卻餽遺捐俸構文興書院卒於官貧不

能殮聞者莫不流涕

府志

周憲章江陰人萬歷間令歸化懲猾胥清耗累多所

修建皆捐俸為之

府志

沈應奎字伯和武進舉人萬歷間守汀清介剛正除

莠安良境內大治祀李少師綱文丞相天祥以自

勵闢陂濬泉課士修廢以循卓稱稅璫高案將自

汀入粵應奎大書榜示欲率吏民擊之璫懼不敢

入境有霹靂巖蓮峰靈隱洞諸咏

府志

聶尚恒字久吾新淦人萬歷間令寧化政簡刑清不

阿權要甚得民兼精醫每公事旁午疾首環候眡

視一一周給無倦色又時遣使至其家問痊否若

親子弟焉 國朝崇祀醫廟府志

蔣育馨長洲舉人令清流拒連邑飛派浮糧設倉廩

移驛地增城樓民咸德之府志

朱大典金華進士任給諫疏觸魏璫調外天啓六年

任漳南道駐上杭值水災民乏食大典捐俸賑饑

民賴以甦公餘令營伍訓習兵法軍容大整明年

流寇出劫邑以有備得全府志

何守成分水舉人知永定縣創學田建義倉舊增三

千餘丁力為請止有前有王父後有許毋賢哉何

侯二公接武之謠府志

徐日隆鄖西人崇正中為寧化令值中宜寇作懸賞

格購盜不一月皆就擒寧民爭醵金償所捐賞格

日隆麾辭不得乃解供楚餉

祝禧武平所千戶崇正辛未廣寇據永平寨禧力戰

死百戶王國耀邱泰俱殉焉府志

陶志學武平所百戶藍塘之戰與其子鈇百戶徐治

王道垣俱力戰死府志

羅萬藻字文止臨川舉人崇正未知上杭縣時寇賊

充斥兵餉無額暫支河稅旋上司檄解軍心騷然

萬藻為力請得免解鄉兵賴延漢等十三人劫來
蘇里擒置獄其黨練勝龍擁眾幾二百人有號狼
頭星者謀內應之變起倉卒萬藻斃其渠魁餘黨
悉散民賴安堵府志

國朝

周亮工祥符進士順汭間以本省叅政駐節上杭時
山海交警亮工日夜登陴戒嚴撫慰軍卒中軍呂
吉橫肆亮工廉知其狀捕置之法革巡道衙門供
應尤加意造士雖羽書旁午猶汲汲於人才省旋
日士民無不流涕攀留者府志

許賓字于任福州人浙江督學秀子清流訓導講學
明倫尤汲引善類孜孜如不及被容接者如坐春
風以卓異歷御史府志

許廷鏢字子遜吳縣舉人雍正間知武平縣吏事明
敏不事鉤距而人無敢詆欺者工詩古文詞精騎
射人士沐其教如坐春風中忘其為長吏之堂也
以累罷空手而歸乾隆辛酉中丞王恕延主鰲峰
講席邑人聞之有不遠千里裹糧問業者歸愚文鈔

史園歸安人由乾隆丙辰庶常出知上杭絕苞苴清
訟獄嚴戢盜賊境內肅清歲稔捐俸糴江廣粟以

賑饑尤汲引士類躬為督課獎進之文風為之一變卒於官士民尸祝焉縣志

張文偉襄平人令長汀除漕弊陋規修文廟拓齋

廡蒐輯邑乘以廣文獻獄無大小聽斷必以情亦

無留牘自奉清苦攝郡司馬篆扣退運米以甦民

困縣志

福寧府

宋

楊志字存誠龍溪進士嘉定間令長溪百廢俱舉大者如砌楊梅嶺建金波橋民咸思之判廣州卒府志

林子勳字翼之永康人淳祐中知福安縣時縣初建

諸凡草創子勳經理有條居官以廉謹聞府志

詹棨字德寬崇安人嘉熙中進士令福安有婦陳氏

死非命棨覆驗得竹刃於腹寃乃直遷瑞州法曹

府志

元

林天賜至正中知福安縣時有盜魁邱寧久肆剽掠

天賜以計擒之值歲饑詢民疾苦以慈惠聞府志

明

黃溥字孟周洪武四年知寧德縣建學校禮師儒為

政以廉平著府志

鄭齊江山人永樂中令福安興學校均徭役恤鰥寡

去後人思之府志

劉廣衡萬安人以御史撫閩浙景泰間壽寧鄭懷茂

亂廣衡與副使沈納討平之議請設縣民思其功

立祠以祀子喬孫玉相繼官閩副使府志

沈訥吳縣人景泰間任按察司副使督理銀場討台

山寇中鎗飲矢戰益力卒殲醜類民德之與劉廣

衡俱祀報功祠府志

胡庭芳字子蘭東莞人監生景泰間知福寧縣廉慎

恤民加意學校公暇集諸生講課入覲卒府志

何喬新字廷秀廣昌進士成化中以建寧道按部福

寧奏復縣為州建王伯顏祠勘恤福寧水災歷官

刑部尚書諡文肅府志

馬迪字惠吉仁和人成化十六年任州同修舉廢墜

凡便民者無不為善詩篆所至多留題府志

馬時中字希德潮陽人成化中知福安縣政尚簡要

勸農桑興學校俱有成效人多稱之府志

蔣輝全州舉人以邵武同知署州事均民徭役貧富

不偏民德之府志

楊澤天台進士以憲副行部至州修學宮集諸生講論若師友祀朱子於般若庵葺王伯顏祠府志

李時東筦舉人宏治十六年知州事慈祥樂易正德戊辰入覲藩臬科金以賂闖瑾不應臬復欲罰民

清軍道時陰主民勿往役臬怒時曰政體自下而上事宜由州覈後竟寢府志

李長字復之縉雲進士授戶科給事中正德十四年以直言謫州判蒞政廉明人不敢干以私署縣篆

旌善鋤奸時稱神明府志

鄭嘉祥字應麟南海人正德間任寧德典史剛直不阿

歷官六載多所贊畫尊師儒重學校士民頌之府志

羅幹永豐人倫子正德舉人知寧德縣剛介果毅以教化為先朔望謁廟升堂進諸生講學示以修己安人之要在官三年法立令行人不敢干府志

葉稠嘉靖八年知寧德縣儲穀以防饑購田以贍士建書院表章陳石堂韓古遺諸君子改白鶴故道

擢知合州府志

夏添構字維金融縣人以南安令擢知州事開義井培雉堞有能聲改官時方鑿泮池架石橋其上猶給直而後行府志

舒春芳鄱陽進士分巡建寧聞倭警兼程至州募客兵萬餘躬甲冑與三沙大金等倭戰於赤岸橋復聚鐵製銃以金錢為的中即與之兵益精倭復攻城火箭齊發賊宵遁府志

徐作號念吾南昌進士以叅政巡州政尚簡靜城東西隅近山賊得憑高窺伺作建敵樓蔽之至今賴焉府志

徐甫宰山陰人嘉靖己未以舉人令武平奉檄覈餉全州適倭入寇州牧柴某病篤以印屬甫宰率民守城簡勇士為遊兵與渠酋大戰金字山賊盡殪

會夜賊攻東南甫宰令急備西北賊果從西北梯城守兵投巨石以擊賊遁去已而倭大至合圍攻城登北埤下石如雨甫宰守益嚴發砲擊賊死甚多乃焚東郊而去州得以全後以勦武平山寇功擢僉事府志

按甫宰見前志汀州名宦因事不同故存之羅文靖號次山南昌人萬歷中以舉人知州事操履廉潔政尚寬恕州故有里役銀五百素為官吏乾

沒文靖首革之去之日行李蕭然民為立祠府志史起欽號敬所鄞縣進士萬歷中知州事年少敏達

於瘡痍甫定之時以寬仁濟之興衰起廢修公署
學校濬城河置學田建文昌閣秩滿擢常州郡丞

府志

楊繼時錢塘人萬歷間知福安縣折獄如流剔蠹殆

盡修學校置學田擴泮池尋以艱去士民愛之府志

金汝礪字順德平湖進士萬歷間知福安縣擴東北

城造西門壩絕內瑞徵求坑治之害殲盜魁直寃

枉增應試額立賑貧田在任七年如一日及去士

民立祠以祀府志

利灌博羅人以歲貢任寧德訓導時倭變後城郭邱

墟寄居山寺風雨凄其晏如也同官胡德邁疾卒

醫藥殞葬傾貲以助終兩府教授府志

舒應元號及吾南昌舉人萬歷中知寧德縣留心建

置凡學廟祠壇城垣縣治煥然一新復置學田以

資月課著有寧德縣志寧陽政紀府志

鄒用章宜黃人萬歷中以舉人知寧德縣邑北有溪

每山水迅發徒涉者苦之用章捐金造橋民為建

碑頌德又建鄒侯芟憩坊於北郊

劉若侗順德人弱冠登賢書萬歷中知壽寧縣鯁直

不避權貴時邊餉孔亟上官飛檄如雨若侗以壽

邑凋殘寧受下考去日行李蕭然士民送者泣下
府志

張元新會人萬歷中以舉人知壽寧縣增修義學躬
自督課凡貧生有不能喪葬者出俸金賻之聽斷
明允邑無冤民
府志

區懷素高明舉人崇正十一年知壽寧縣捐俸修城
後山寇之變邑賴以寧
府志

洪祖烈字定遠吳江人萬歷武進士授金山衛把總
陞汀州守備有捍禦功崇正間歷官京營神樞叅
將加後軍都督未幾留都陷祖烈從唐王走浦城

順治三年 大兵收閩至浦城祖烈被執見 貝
勒不跪諭之降答曰負國不忠辱先不孝忠孝兩
虧何用生為 貝勒問以餉曰有餉即戰何至於
此百姓欲為代輸祖烈不可曰何忍以我故重累
汝等且為奇男子而從敵人求活乎嚼舌大罵令
牽出斬之祖烈奮身奪刀自刺胸死同時死者鄭
為虹等十餘人
沈彤吳江縣志

國朝

戴廷輝字子山東萊人以太學生隨 王師入閩授
寧德縣嚴明仁恕辨枉擊奸招集流亡獎勵學校

捐粥賑饑市牛種以給窮民民懷之祀名宦府志

金光緒字九光德州人順治六年知寧德縣時因海

寇民多逃亡光緒招徠勸諭歸農者衆九年謝事

去民皆感泣府志

李卽龍字子潛雄縣人順治己丑進士知寧德縣丙

申海寇猖獗卽龍守禦備具寇不敢近民賴以安

府志

張禮號寶山榆林衛人順治初以遊擊駐寧德時山

海交訌剽掠無寧日禮設奇扼險屢挫賊鋒賊懼

宵遁邑賴以安平居恤民愛士有儒將風府志

周士元監利人康熙二十三年任總兵樹松木浚城

濠建義學置義冢至今頌之府志

蔣國榮奉天鑲藍旗人康熙三十八年知福安縣秋

大水哀鴻滿目國榮賑恤安集民無流亡府志

閻達禹遼東人康熙二十七年知寧德縣修明倫堂

置義田以給士貧者延師教之府志

余震號海如進賢人康熙三十年知寧德縣隆學校

恤窮民時防兵肆虐繩以法無敢爲暴既去士民

建祠立坊於西門外府志

嚴德泳烏程人康熙五十年知福安縣建啓聖祠興

紫陽書院先是白石司渡夫及里胥考綱滋弊德
泳卽詳革之以最擢戶部主事府志

程豫四川人康熙四十二年知寧德縣減免綱銀民
丁無派累之苦弛海禁許捕魚民賴以生去之日

環聚號泣祖送數十里府志

尹鑣字和鸞貴州舉人康熙五十七年知壽寧縣察

民疾苦裁革徵派之累性慈祥不事鞭扑民感之

無訐訟者囹圄爲空在任九年清操不渝府志

方伯字戴濱潁州進士由湘潭令調知壽寧性嚴肅

人無敢干以私先是里長催徵名曰排年受累最

苦伯改滾單法吏胥無所容其奸民甚德之府志

顏光旸號宜庵亳州人雍正元年總兵開羅漢山沮

址以備旱潦歲荒運米以賑尤加恤戍臺兵人懷

之府志

潘毓賢雍正間任寧德縣丞駐防周墩轄七里三十

餘村俗以沙冷多棄地毓賢教民樹麥給以麥種

不責其償數年麩麥盈野至今賴之府志

馬大紀字冀周上元舉人雍正十一年任壽寧縣報

豁浮糧千戶在任十一年囹圄空虛去官之日行

李蕭條府志

潘質原字德載濟寧州人任壽寧縣修城池建文昌祠造東西木柵邑有兵米與民糧混吏掾因緣為奸質原為剔其弊民至今賴之府志

冷岐輝嘉定人雍正十二年以舉人知州事適州陞

為府附郡設霞浦縣即管縣事經理一切公廨壇

宇及建設章程皆井井有條時有冷慈父之稱擢

順天治中府志

路以周招遠人雍正十二年以舉人知福安縣繕文

廟建尊經閣修學志培西郊水壩去之日人為立

碑建亭曰路公亭府志

傅維祖鄞縣舉人乾隆四年知福鼎縣時邑初建

公署學宮祠壇廟宇草創經畫具有條理府志

藍應襲大埔舉人乾隆六年知霞浦縣事廉能有聲

尤雅意作人童子試拔其尤者延師教之皆有成

就府志

吳鵬字程達南安副榜任福安教諭謙和古樸喜文

章以文質者方飯投箸立正士林戴之府志

周天福亳州人乾隆九年知寧德縣戢暴除奸重儒

興學建鶴峰書院文昌閣和義門西湖橋士民祀

之遺愛祠府志

丁居信字南屏儀徵人由庶吉士改知壽寧縣下車
修文廟築治前石橋鑿灘河開衢路振興學校
暇則與士論文在任三年調鳳山再補南平卒於

官府志

蕭克昌咸陽舉人乾隆二十年知福安縣潔已愛民
捐膏火以造士復修理學宮城垣橋道靡不畢舉
奉調入闈以勞卒士民哀之府志

康天墀龍溪人乾隆辛酉舉人屢秉鐸能盡其職二
十一年陞福寧教授每日親至文廟灑掃祭則

備物盡志嘗捐浚泮池鑿石豎櫺星門攝縣學改

建五王祠重新兩學木主課士論文終日不倦卒

於官囊無餘貲府志

臺灣府

國朝

季麒光無錫人康熙丙辰進士二十三年知諸羅縣
事時縣治初設人未向學麒光選童子之俊者禮
之親爲辨難士被容接如坐春風在任踰年首創
臺灣郡志未竣以憂去三十五年副使高拱乾因
其藁纂成之府志

張尹崢縣人歲貢生康熙二十九年知諸羅縣以憂

去服闋補漳浦再調諸羅見邑治新造多曠土招
 徠墾闢撫綏有方流民歸者如市三十一年蝗珥
 日巡行阡陌間竭誠祭禳蝗不為害莅任四年未
 嘗輕笞一人慢辱一士居無赫赫之名去後嘗令
 人思遷河南彰德同知邑人肖其像於郡治竹溪
 寺府志

王仕俊鑲紅旗監生康熙四十三年知臺灣縣前任
 陳清端瑣倡修文廟以內召未竣仕俊踵成之
 復建義學延師課士斷訟精明多平反故令李中
 素因浥爛倉穀羈留家屬賠補事逾十載仕俊代

為補苴旅櫬得歸莅任四年以勞卒於官臺灣縣志

黃叔璥字玉圃大興人康熙己丑進士六十一年新
 設巡臺御史叔璥首膺是命安集措置多得當著
 有赤筭筆談番俗六考採撫最富後之脩郡志者
 率取資焉府志

王作梅河內人康熙己丑進士雍正二年任海防同
 知時廈門有商艘往來澎島與臺灣小船偷運接
 盤米穀名曰短擺作梅廉知急捕之併發官弁交
 通狀提標哨船二十餘艘絡繹來臺貿易號為自
 備哨凡出入海口不由查驗作梅詳請禁革他若

客頭勾引偷渡久成錮弊作梅擒首惡痛懲之積習爲改民愛之傳頌不衰府志

夏之芳字荔園號筠莊高郵人雍正癸卯進士官御史六年巡視臺灣兼理學政以澄敘官方振興文教爲已任歲科兩試至公且明按巡南北路鷄犬不驚性廉介絕苞苴接物樂易冲和絕少崖岸尤爲僚屬所敬服著有海天玉尺二編府志

林天木字荔山潮州人雍正癸卯進士官兵科掌印給事中十一年巡察臺灣取士以品行爲先接僚屬嚴而和人敬愛之府志

方邦基字樂只號松亭仁和人雍正庚戌進士調知鳳山縣請減重賦免浮糧民番感之有貧不能娶者妻母欲令其女改適訟於縣爲擇吉捐貲使得完娶民婦被祟爲禱於神忽雷震怪走入地掘之得猴子鬪髀有血濡縷怪遂絕丁艱歸服闋陞臺灣同知革陋規禁書役需索凡商船驗畢卽放行尋遷知府改建公署平放兵糧廉敏著聞渡海遭風溺於水予卹贈朝議大夫布政使司參議賜

祭葬臺灣縣志

覺羅栢脩鑲紅旗人以御史巡臺雍正十年北路大

甲西社番肆逆趨赴軍營籌畫餉運以軍功議敘
晉內閣學士兼禮部侍郎

楊二酉字學山太原人雍正癸丑進士以御史巡臺
奏建海東書院以造士南門內秀峰塔亦其所規

畫也

府志

張湄字鷺洲錢塘人雍正癸丑進士由編修改御史
巡臺灣嚴稽昌籍校士公明所著有珊瑚枝集瀛壖

百咏

府志

曾曰瑛字芝田南昌人乾隆十一年調臺灣淡水同
知攝彰化篆建義學以教人士擢汀州知府郡有

龍山書院鞠為茂草曰瑛捐俸繕葺復纂府志纂
教場隄百廢俱舉每巡行各邑設旌善懲惡二簿
籍其姓名獎戒有差士習民風為之不變調知臺
灣府值天旱步禱烈日中旬餘得雨而曰瑛遂病
暍卒民哀思之

香草齋文鈔

永春州

唐

王顥字還古唐大中間為桃林場長有惠政盛均記
曰鶯泊未還祿為親屈莫邪會試犀象無全

閩書

顏仁郁歸德場人為本場長時政荒民散仁郁撫之

一年襁負至二年田萊闢三年民足用有詩百篇
 宛轉回曲歷道人情邑人途歌巷頌之號長官詩
 其諭農詩日夜半呼兒趁曉耕羸牛無力漸艱行
 時人不識農家苦將謂田中穀自生

閩書

宋

林滂開寶三年知永春縣縣溪自卓埔而上湍流駛

激盤阜紆蹙不利裝載滂鑿去馬甲山門滑石西

涵四險灘大為民便

閩書

歐慶字貽孫乾德人以彭州軍事推官知縣事故與

中書令鄧文懿同邑同時文懿貴顯於朝慶為州

縣吏所至上官多鄧故舊絕口不道終其去人不

知其為鄧友也作吏廉貧以厚德名於里

歐陽文忠文集

閩書
合纂

傅誠字叔汶嘗師朱子淳熙進士授永春尉力辨陳

介珪冤納告憲臺求去冤卒得直侍郎黃艾使北

奉辟為屬遷太常博士與真德秀交好寧宗朝論

對頗鯁切暴卒殿下人盡惜之

閩大紀

明

王忠上海人洪武三十三年為永春丞勤吏事蠲稅

糧均徭役奏革額辦段正民德之

閩書

王貞永嘉人洪武九年任德化謹身正已一清如水
涖民如撫嬰孺待士如接賓客一時風化淳穆好
娛情山水公餘援琴賦詩悠然自得閩書

溫琇新會人永樂中知永春寬而愛人勸農興學均
役平賦嘗奏減歲造皮張士民德之閩書

杜住西安人宣德間知永春蒞政之日首詢民疾苦

先學校重教化延碩士以教諸生政事精敏吏畏

民懷卒官無長物閩書

葉珠上饒人知永春地舊有桃源驛明初罷凡送迎

廩餼之需一切責辦里甲時議以永德二縣田糧

幫貼水口晉安康店等驛遣官督併民幾變珠嘆

曰昔之牧長若王忠溫琇錢宗顯輩皆能減民歲

辦惠此一方予何弗能力忤當道上疏乞休當道

感動乃除之閩書叅舊邑志

陳宗全廣東人宣德十年知德化縣明恕廉介先教

後刑未幾邑中大治閩書

胡潛字孔昭績溪人宏治間知德化縣居官三年廉

潔自持凡水利橋梁廨舍悉捐俸倡修訟者常勸

化之使自省鞭撲不施囚繫不及老幼以艱去縣志

徐衡常山人嘉靖中為永春訓導柴鑣同時甚為所

重陳琛稱其以垂白之年孜孜進學而時出所得以淑士

閩書

許仁字元夫仁和人嘉靖七年知德化縣毀淫祠創社學設學租築射圃復教場甃壇墼濬丁溪修春波樓繕廨署建名宦鄉賢祠置漏澤園養濟院多著政績後改調同安

縣志

劉三錫廬陵舉人嘉靖間知永春遭寇亂之後首詢民瘼痛自節約上供之外一切常例悉罷之署篆晉江為當道器重以艱歸民遮送信宿慰而遣之服闋陞本府通判邑人喜躍奔迎於家竟高臥不

起

閩書參舊邑志

梁道凝鄖西人知永春才諳明敏情僞至前瞭然洞矚邑有鉛礦聚眾蓄奸親詣封閉莫敢撓者戢隸役不得下鄉署晉江南安皆有異績以憂去

閩書參舊

邑志

胡惟立高安人舉人嘉靖間知德化縣廉介自持常賦外不取加耗勤慎蒞事案無留牘輕徭役恤困窮卒於官邑人懷之

縣志

緒東山號三南馬平人嘉靖舉人知德化縣訟清政簡建丁溪書院日進諸生而教之置學田為廩膳

資構駕雲亭復古義社邑士民祠於龍潯山之麓
縣志

張大綱字立卿龍川人嘉靖間知德化縣前令鄧景
武築城新就大綱復營建使堅厚適永春賊呂尙
四薄城綱親督戰悉擒斬之尤惠愛百姓作興人
文創建書院於龍潯山之麓
縣志

秦霽崑山人隆慶舉人知德化縣遷學宮於城外大
洋山之陽費不煩而事集諸生德之與緒東山竝
祠
閩書卷
縣志

丁永祚南昌舉人知德化縣豁鹽稅絕關提抑豪強
邑民尚氣涵濡漸化之不怒而威闢邑南門建樓
其上調福清歷官湖廣副使
縣志

俞喬休寧人嘉靖舉人知大田縣公廉有威山寇竊
發盡力防禦邑賴以全卒於官
縣志

蘇黎庶番禺人嘉靖舉人知大田縣時當兵稜之後
招撫安輯賑民課士完城塹創敵樓政治化流行
部使者疏其賢超擢廣西平樂府同知
田種台
文集

林大雋字惺非隆安人萬歷舉人知德化縣建狎霄
塔濬丁溪故道勤督課口授耳提人士歸之
縣志

桂振宇號蓋我石埭人知德化縣慈惠和易勸民藝

麥而給以糧教民醫療而濟以藥修學宮鑿泮池
創寅賓館築春臺置遺愛祠葺城隍甃龍津鳴鳳
二橋成異方埽百廢俱舉復釐別侵沒學田以資
膏火諸生王乘乾貧不能婚資金代聘楊經沒貧
無以殮為棺衾而葬之縣志

諸大木號巽齋餘姚人萬歷舉人知大田縣清伍符
省郵傳飭坊市崇學宮繕祠宇完城塹建遺愛祠
百廢俱舉縣志

王永吉號鐵山高郵人萬歷進士知大田縣有能聲
邑有鄉紳田姓者嘗宴前令於園中席未及半令

忽瞶瞶不能語急扶回死矣田姓逮繫獄久不決

永吉廉得其情因邀恤刑同至其園折毀垣墻於

中得毒蛇盈數石永吉曰砌古則陰沴積當有蛇

虺窟穴其中涎墜餽中誤食之無不立斃者前令

之死由此也獄遂得解後仕至尙書讀律佩觿

盧敬號穗溪東莞人大田主簿署縣事猝有賊至挺

身與戰賊被劊而遁旋復駐境上敬與典史孫熙

禎日馳數十里與戰敗之邑賴以寧田種台文集

魏謙字益之慈谿人萬歷乙亥為大田尉有機智每

盜賊竊發用計擒之四境以安縣志

國朝

黃琮江寧人順治三年知德化縣寇莊廷書張益薄

城城中食盡茹草守將棄城遁琮不屈死之縣志

鄭名普寧進士知永春時當兵燹城邑邱墟名勞來

備至民賴以安公署倉庫次第修葺以憂去

鄭功勳字震寰正黃旗人知永春縣修邑志嚴保甲

弭盜省刑邑大治復建朱子祠文昌閣以培士氣

陞西隆知州續縣志

許其誼字子正陝西人進士知永春不避權勢剔蠹

愛民設義學以造士時提弁爪牙入永抽稅力請

禁葦之邑賴以安漳寇犯境率兵民搗其穴平之

續縣志

王世爵榆林人以千總駐防德化順治十四年與寇

林忠戰於螺坑力盡死之縣志

王欽祖閩縣人康熙十八年任德化教諭慷慨好義

在庠寒士多所推解捐俸百餘金修文廟重建

龍津橋士論高之縣志

葉振甲字彰祖慈谿舉人康熙二十一年宰大田葺

文廟修邑志時議增鹽課及採辦楠木振甲力為

民請命事得寢以曷擢工部主事

于翰翊字雙邨正黃旗人知永春嚴保甲清昌籍詳增學額四名捐置義塚修各關隘葺東嶽廟民德之續邑志

范正輅字載瞻鄞縣人康熙丙午舉人知德化縣禁

溺女勸種植建義學設常平倉葺賓陽北鎮二樓

繕堂廡置寅賓館築橋梁修邑乘以勞卒於官縣志

王一導字惕齊黃岡人康熙丁丑進士四十年知德

化縣邑舊有節禮硃價例銀八百餘金里甲派供

多至蕩產一導捐除之聽斷平允案無留牘任一

年以艱去縣志

張廉臨桂人康熙四十七年以舉人知大田縣時寇

盜猖獗一鎮以靜鋤強扶弱民獲安堵邑人祠祀

之

王調元字燮公義州人康熙四十八年知德化縣明

倫堂圯捐俸修建奸匪陳五顯抄略鄉村立收捕

之境賴以寧縣志

俞兆岳海寧人康熙五十一年以明經知大田縣為

政持大體恩威互用人畏愛之調臺灣知縣下車

與神誓以廉正自矢每巡行村落詢民疾苦如家

人父子有所訊鞠辭色懇摯民不忍匿其情歷官

前建系元
至吏部侍郎

永春臺灣
二志合纂

熊良輔蒼谿人康熙己卯舉人知德化縣建櫺星門

及雲龍橋時永春奸民陳謀嘯聚山谷督鄉兵勦

捕民得不擾

縣志

游祿勉字季迪永福人以貢授大田訓導修明倫堂

學舍儀門泮橋著有田陽詩文草四卷陞上杭教

諭卒子紹安任南安太守贈如其官

福州府志

力子侗號知庵候官人康熙五十四年教諭德化修

學宮置祭器手輯

聖廟祀典四卷

縣志

徐有經字松陽西和人拔貢乾隆十六年任大田修

學宮葺書院繕城隍廟建迎恩亭鎮東橋以勞卒

杜昌丁字松風青浦人雍正七年以副貢知浦城縣

盡革無名科歛宿弊一清勤課士優禮其賢者以

最擢永春知州纂縣志築衛城壩建貢士院增闢

書院學舍牧永二十七年政久化成民安其業卒

於官貧無以殮州人士爭賻之櫬乃得歸

增補浦城縣志

龍巖州

明

趙榮祖淮安人洪武三年由都督府掾知龍巖縣幹

濟通敏為政以安民為務興利革弊百廢俱舉民

蒙其惠卒於官州志

伍星奎合浦舉人成化間知龍巖縣興學校立鄉賢

祠建南門樓設預備倉於各鄉邑人思之州志

林濟民字廷泰海陽人弱冠時母病篤強命娶婦入

門而母卒哀毀踰禮及葬廬於墓服闋始合邑鄉

邦稱之領成化丙午鄉薦授龍巖教諭以身率人

陞贛榆知縣有廉惠稱州志

徐鳳岐字文明武義人正德間知漳平縣邑初未有

城宏治間流寇洊至屢為民梗至是寇復壓境鳳

岐力禦之寇遁乃築城垣甃以甃石民賴以安又

於城南龍江造舟為梁以濟行旅治行卓然續傳

謝思本字汝仁耒陽舉人正德十六年知龍巖縣嚴

毅廉明百廢俱舉尤加意學校常市穀三千七百

餘石立義倉卒於官州志

施信餘姚人嘉靖二年由舉人知漳平有德澤及民

越數百年而士民戴之與後令劉鑄並祀漳平縣志

吳守忠高安人萬歷十七年由舉人知龍巖縣至即

革里班宿累時奉文分析漳平得業米七百八十

石有奇米去丁存巖民病之乃力為請命丁隨糧

醜將莊戶另為一圖一體著籍當差尤嚴禁服毒

造蠱諸惡習民風一變

州志

朱泰正字道子海鹽人萬歷進士四十五年知龍巖縣歲饑發賑廉倡亂者置之法邑大水漲沒城堞泰正立水中祈丐撤邑匾付洪流雨遂止發贖銀一千二百有奇分賑災民築城牆修龍津橋後調漳浦未幾擢雲南道御史

州志

彭坂南昌舉人萬歷四十五年知漳平縣為政以緩徵息訟為本精聽斷絕苞苴每有災稔不憚為民請命以最調上杭

余應桂字二磯都昌人萬歷進士天啓中知龍巖縣

廉介有守喜造士尤精於剔蠹刷奸凡苛稅及額外耗費一切報罷建砥中樓修龍津橋饑民率眾攫金應桂治其渠魁餘皆屏跡因以便宜出倉儲賑濟所活無算尋調海澄擢監察御史

州志

何九雲晉江舉人崇正間漳平教諭捐俸建陳布衣祠購廩稅以供歲祀又於東山寺側構堂講學置學田每釋奠必親務豐潔前後居官者鮮有其匹登癸未進士官翰林

州志

國朝

沈穆杭州人漳平訓導善造士被其容接者如坐春

風時鼎革之初悍卒遇人士無狀令長防弁率睥
睨巨室諸子矜惴惴不自保卒獲全者穆撐持卵
翼之力居多州志

查繼純海寧人康熙十九年知漳平縣操履端潔泣
治精勤興利弊民愛服之中蜚語去士民攀號
如失怙恃當道廉其冤事得白州志

沈荃湖州人知寧洋縣修建 文廟殿堂門廡一新
復繕城樓開北門之閉塞以通民前縣蕭亮有祠
爲弁兵所踞荃捐俸建弁署及營房祠得以復又
造橋梁興書院修邑乘百廢俱舉州志

